



# BERG NUUS

DIE BERGKLUB VAN SUID-AFRIKA  
AFDELING TYGERBERG

POSBUS 4572  
7536 TYGERBERG

Mei 2010



## BERGskinner

Hierdie jaar het met 'n spoed weggespring en dit voel of almal aan die hardloop is maar nie so mooi weet waarheen nie.

Die foto hierbo, geneem vanaf Sneekop, was so mooi (*komplimente van Altus*) - ek moes dit net gebruik.

Thanks to all the contributors this month – a battle to get everything together, but in the end worth the trouble – that is why the April edition of the Bergnuus became the May edition.

The AGM took place on 6 February where a new committee was elected. Two meetings took place since then, old members resigned, but new ones joined again. I trust you will enjoy reading about the adventures of your fellow hikers.

*Editor*

## BERGkomitee

Voorsitter: Altus de Wet

074 140 1102 of 021 913 1500 (na ure)

[Altus.deWet@capetown.gov.za](mailto:Altus.deWet@capetown.gov.za)

Vise-Voorsitter: Ludi Basson

082 874 1770 [lwelgemo@pgwc.gov.za](mailto:lwelgemo@pgwc.gov.za)

Sekretaresse: Elza Geldenhuys

083 231 5156 [elza@nickgeldenhuys.co.za](mailto:elza@nickgeldenhuys.co.za)

Tesourier: Joline Nel Steyn

082 379 1748 [gatesejg@gmail.com](mailto:gatesejg@gmail.com)

Lid vir stappe: Hannes Truter

082 441 5413 [hannes@primatoy.co.za](mailto:hannes@primatoy.co.za)

Lid vir jeug & werwing: Sandra Lombard

084 549 6004 [sandralombard@telkomsa.net](mailto:sandralombard@telkomsa.net)

Lid vir skakeling: Mariana Rabie

082 871 1114 [mariana@agriexpo.co.za](mailto:mariana@agriexpo.co.za)

## BERGnuus

Beaverlac – Des 2009

Hierdie was nie 'n amptelike Bergklub stap nie, maar ek het tog die behoefte om my verrassing met hierdie pragtige plek met die oningeligtes te deel aangesien

verskeie van die lede gereeld daar gaan kamp.

Beaverlac is 'n privaat kampterrein op die Oliviers se plaas in 'n pragtige vallei tussen die Groot Winterhoekberge en die Cederberge, Noord-oos van Porterville. Die kampreëls is streng (genadiglik so), die natuurskoon onbelemmerd en die stilte tasbaar ... en as mens gelukkig is, kry jy die uitsoekplek onder die groot ou akkerboom.



'n Mens kan vir dae daar kamp en elke dag 'n ander roete stap en sonder uitsondering op pragtige watervalle, bergpoele, rotse en verrassings in die veld afkom. Op ons dagstap na Afrikahut het ons 'n blaaskansie geneem hoog bo-op die rotse met hierdie pragtige uitsig.



Maar ons het ook op hierdie kleinood in die veld afgekom: "sal mens dit 'n graf of 'n troon noem?"



*Ludi wou seker maak dat dit nog werk*

Genoeg gesê. Ludi, Brigitte en Frik stem saam - dit is baie mooi en beslis 'n besoek werd.

*Mariana Rabie*

'n Brand het intussen 'n groot deel van die plaasveld beskadig, maar die kampterrein is steeds piekfyn.

Goudini Sneekop – 20-22 Maart

Vir die eerste keer in menseheugenis het ons 'n ander toegang gebruik. Gewoonlik gaan mens oor Andries Klipvoet se werf en op in die kloof (langs waters waar daar rus is). Maar toe besluit leier Charlie dat hy en ek en Japie met die boer se steil "jeep track" makliker in die berg sal kom. Ek het ook nogal so gedink. Maar die uitkoms was anders.

Die jeeptrack begin lig en vrolik met uitsigte oor die wynlande, Worcester en die Breede Vallei, maar dan word hy maar steiler, en uiteindelik hou hy op in 'n

sirkelding. En dan is dit hy, die son, die hakea en die berg. En nie eintlik water nie.

Maar ons mik moedig voort gelei deur Charlie se ingeboude kompas (en nou en dan 'n skalkse loer na my GPS). Die veld is lelik oorgroei met Hakea, denne en die fynbos kort brand - in kort "tough going". Ons mik vir 'n nekkie wat ons verwag het soos die poorte van luilekkerland sou wees, maar dit het nog kranse, denne en geen water gebring nie. So teen amper drinktyd (vanaf 15h) is ons met vreeslik steil walle en deur dennebosse af op soek na plat plek en water.

Ons het kamp opgeslaan op 'n plat plek so groot soos 'n garage (*serias*), met darem 'n watertjie vir die lyf en die keel. Almal (al 3) het salig geslaap, en dit was nie die beddens wat so sag was nie.



Die volgende dag was die Groot "Summit" dag (met Goudini Sneeuksop) as mikpunt. Die eerste paar ure was koel en mistig, maar die dag het geleidelik uitgedroog en opgewarm. So teen 13h00 se kant het ons die piek gehaal, moeigerig, om die minste te sê. Maar (soos

meeste pieke), bied dit mooi uitsigte oor die Wemmershoek, Du Toitskloof-reeks, Holsloot / Stettynkloof se kant toe en sommer die hele aarde.



Na 'n tydjie se fotonemery en hoe-haa het ons afgeklim via 'n ander roete, vir nog mooi uitsigte. By ons "basis kamp" het ons ietsie geëet en 'n bietjie gerus. Die leier was wreed. Hy het ons verder gedryf (om dag 3 korter te maak). Dit het beslis gehelp! Ons het die namiddag oorblyfsel van ou beskawings in die kloof herontdek (ou BKSA kampplekke van so 5 jaar terug). Verrassend is die houtskool (en foelie) in die vuurmaakplek nog so vars soos eergister. Die aand het ons lekker gekuier en geslaap teen 'n stroompie tussen groot klippe, ook met mooi uitsig van die vallei onder. Charlie het na Freda verlang en ek en Japie het (water) gedrink.

Die derde en laaste dag was lank en baie afdraand en Warm! Die ou bekende voetpaadjies is weg en toegegroeï, ons moes dus meesal pad soek. As gevolg van die digte bosserasies is ons vroeër af na die stroombedding; daar was dit effe



makliker om op die ronde wit klippe te “bolder hop”. Plek-plek het ons weer vasgeloop in boskasies, dan stap mens maar net *om* dit.

So teen 12h00 was ons op (amper) plat grond en het ons vir oulaas ‘n koel “skinny dip” in die koel stroom gedoen, warm sop geëet, ‘n slapie gedoen en die laaste paar kilometer aangedurf (wat besonder WARM was!)

Die is ‘n mooi bergstap, maar eish – dit was rof dié keer, Ons stem saam dat die area eers ‘n slag moet brand om dit meer toeganklik te maak. Hou hom dop... ons gaan weer!

*Altus de Wet*

Die Klein Leeukop dagstap op 27 Maart het letterlik uitgewaai.

Jan du Toitskloof – 3-4 April

Dit raak deesdae ‘n groot gesukkel om permitte te kry vir die plek. As gevolg van wangebruik was die kloof so verniel en bemors dat CapeNature drastiese stappe moes neem om die kloof te laat herstel. Tans word daar slegs mense op 2 naweke per maand toegelaat: een naweek vir BKSA lede en die ander naweek vir die “Piscatorial Society” (dis die stroomvissermanne, vir die wat wonder). Die ander twee naweke kan die kloof rus, ruis en slaap.

Ek het laas jaar is Oktober al begin e-pos, skryf en smee om plek te kry en is toe al meegedeel dat ek eers 3-4 April 2010 kon plek kry - en dié was die laaste kans voor die

winter. Ek het dit met groot dankbaarheid aangegryp en eers later besef dis Paasnaweek en KKNK en als in een, veral toe mense nie bespreek vir my “favourite” stap nie! Op laaste het net AAAJ hierdie wonderlike kloofervaring beleef (Altus, seker vir die 30ste keer (tel nie meer), Andries, Albert en Japie.



Ons het Saterdagand eers begin om die kloof se water so bietjie kans te gee om op te warm (en om rustig in te pak en dalk ‘n bier of twee te sluk). Die voetpad was sigbaar minder gebruik en plek-plek selfs half toegegroeï, maar dis goed so. Die *Hakea* wat by die mond van die kloof versprei is egter kommerwekkend, ek sal aan CapeNature rapporteer, en dalk kan ons een naweek gaan help uittrek (wie is lus?, kontak my solank)



Die kloof is en bly baie mooi...met bekende plekke soos “Ball & Block”, die klein boesman-tekeninge, die “bo-waterval” (‘n waterval so 10m bo die hoofstroom) en natuurlik die Oorhangrots, ons “home from home”.

Ons was redelik vroeg daar en het ‘n lekker middagslapie gedoen, eers in die skadu van die eeue oue sybas-boom en later onder by die poel – toe die laat-lae-son ons begin uitbak! Die dapperes het die poele en “glybaan” aangedurf en Tarzan styl aan die kranse gehang (jodel en al, nê A?). Geskaafde sitvlakke getuig daarvan dat die “glybaan” nie regtig so glad is soos mens dink nie.

Sononder het ons soos altyd op “sundowner” klip gaan stelling inneem met die nodige laafwater en te veel soorte southappies. Ek het maar weereens vir AAJ herinner dat dit die plek is waar ek tog eendag my asse (op ‘n winderige dag) in die wind wil laat sif op al die water en rotse wat was, wat is en wat weer sal wees.

Die aand het ons lekker gekuier met die geel lig van (kers)vlamme teen die rooi rotsdak met daarnaas die spikkelsterre teen die blouswart naghemel en later ‘n salige stroomgesuste slaap.

Sondag het ons die kloof verder op verken, plek-plek raak dit “tricky” as mens moet klim en klouter om bo die groot hoë poele verby te kom. Maar die ruwe skoonheid lok jou telkens om die volgende draai. Die

eindpunt was “Shute Pool” waar ons gewoonlik in die somer afgly om 5m laer in ‘n groot blou poel te plons. Die keer was bietjie koel en het ons maar soos dassies in die son gebrui.

Dan die lang en rustige terugtog, maar darem met ‘n siesta weer by die Oorhang. Hierdie plek is “great”, so naby en tog so wild. So oermooi. En ek dink nie dis net ek wat so voel nie. Ek bespreek binnekort vir die volgende stap. Wie kom saam?

*Altus de Wet*

Kaappunt – 10-11 April

Na ‘n vroegoggendrit deur die Suidelike voorstede - Vishoek en Simonstad - met Johan se 4-Motion daag ons 6 by die ingangshek van die Kaappunt Natuurreservaat op. Vinnig rugsakke bêre by die kantoor en daar vertrek ons.



*Reline, Johan, Elmien, Otto en Erica by die beginpunt*

Stap op die Oostelike hang verby Smitswinkelbaai met pragtige uitsigte oor die hele Valsbaai en natuurlik tot by Kaappunt (en ons oornag hut in die verte). Af in ‘n

klofie tot by die eerste strand, die gewraakte Booi se Skerm, want dis hier waar die uwe die pad effe byster raak en as strafklousule hierdie berig moet skryf. Na 'n klein oponthoud (sic), vertrek ons verder kuslangs verby Buffelsbaai, Da Gama se kruis en Antoniesgat.

Dis 'n lieflike blou blou dag met 'n ligte briesie om ons koel te hou. Die fynbos is verbasend mooi en blomryk vir hierdie tyd van die jaar. Oral fladder skoenlappers rond, ons sien bokkies en selfs 'n skilpad. Elke nou en dan kom ons 'n bobbejaangesin teë, kompleet met ma, pa, tieners en klein babatjie al swaaiend onder die ma.



*Nog steeds aan die Valsbaai kant Erica, Otto en Dirk*

Vroegmiddag (2 uur) daag ons by Ericahut op wat effe eenkant staan. Dit is in 'n baie goeie toestand en volgens bergklimstandaarde het dit 'n goed toegeruste kombuis. Maar min genade nou van ons leier, Otto Pienaar - ons moet voort oor berge en dale tot by die vuurtoring. Baie buitelandse toeriste te sien en ons groepie verwonder ons aan 'n pragtige Rolls Royce. Nog is dit het einde niet, af, af met die paadjie tot by die ou vuurtoring voor op die

punt wat ondoeltreffend was en hoër gebou moes word, vanweë die baie mis wat daar voorkom. Na 'n lekker bier/koeldrank in die restaurant is ons teerpad langs terug na die hut, met Dirk wat stal geruik het en met lang besliste treë onder ons uit is.

Daar gekom, kon ons almal 'n lekker warm stort geniet, asook ons "sundowners" met 'n lieflike uitsig op die sakkende son wat agter die Atlantiese oseaan verdwyn. Maar eers het Dirk en Otto hul vernuf getoon deur die bedelaars (bobbejane) met klippe en 'n kettie te verdryf. Gelukkig is niemand getref nie. Na baie bespiegelings oor wie die mooiste man op aarde is, heerlike gebraaide steaks en die vrug van die wingerd, is ons klompie bedwaarts.

Nie te vroeg nie, die volgende oggend, vertrek ons met 'n strandpaadjie wat al langs die Atlantiese kus kronkel. Steeds die koel briesie en die reuk van bamboes in die lug. Meer 'n Weskus-atmosfeer met laer fynbos en die veld yler en droër. Miskien selfs vervelig na die vorige dag se uitsigte en kranse. Net voor die einde van dag twee se 20,5 km is daar egter 'n paar koppies waarteen ons moes uit en weer af wat dié roete meer interessant gemaak het.

Vervuld met die natuur by die Kaap van Storms keer ons tevrede huiswaarts. Beslis die moeite werd, Dankie Otto.

*Erica Benkenstein*



## Kromrivier – Witteberghut 17-18 April

Saterdagmiddag 14:00 vertrek ons groep stappers (Gerrit Kritzinger, Otto Pienaar, Elza Geldenhuys, Charlie & Freda Buckle, Verwey Wiese en sy seun Ben)

Op die teerpad na die parkeerplek kom ons die eienaar op sy "quadbike" tee en moet ons eers verduidelik wie ons is en wat ons daar soek, maar gou word 'n paar vriendelike woorde uitgeruil en is ons weer op pad. (Die eienaar beoog om 'n span mense in te kry om die dennebome wat pla in Julie te kom uitsaag)

Sommer gou is die halfuur se stap na die Kromrivierhut agter die rug. Ons slaan ons tente onder die bome op aangesien 'n groep dames van die Paarl Wellington afdeling reeds die hut bespreek het. Verwey en sy seun Ben durf die swempeel aan om te "bad" voor die son sak (Ook meer moed as wysheid as jy my vra). Toe is dit tyd om kos te maak en te kuier en stories te vertel. Klein Ben hang aan die storievertellers se lippe en as een storie klaar is vra hy dadelik "vertel nog een asseblief Oom!"

Sondagoggend vroeg vat 'n paar van die ongeduldige dames solank die pad – heel verkeerde koers en begin ons met 'n boendoe bash deur die nat gedoude gras om weer op die voetpad te kom!

Ons stap om die Kromrivier dome tot onder Witteberg waar ons eers stop vir teetyd. Toe is dit bergop – voorwaar 'n formidabele piek om te bestyg. Gelukkig is die span stappers kanniedote en klein Ben verstom almal.



*Verwey Wiese en seun Ben*

Middagete word bo op Witteberg se piek geniet terwyl almal die ongelooflike uitsigte op al die ander berge en ook Du Toitskloofpas besing. Klein Ben oorwin sy hoogtevrees en poseer kordaat op die kant van die afgronde vir 'n paar dramatiese fotos om die moederhart tuis mee te gaan terroriseer.



Na middagete is ons al knie knersend af tot by die vallei onder Witteberg. Dis voorwaar 'n pragtige area en ons moet gerus in die toekoms hier kom basis kamp maak en die omgewing dan verder verken met dagstappe. Na die middag teepouse durf ons die steiltes oor Kromrivierdome af, aan tot by die hut. Tente word opgeslaan en teësinning stap ons terug na die voertuie wat 'n fantastiese naweek tot 'n einde bring.

Elza kla sy is klaar met peke maar klein Ben word geprys - hy het almal verbaas en baie goed gestap vir sy 8 jarige ouderdom.

Miskien moet ons 'n groepie stappers bymekaar skraap en 'n naweek vat om die paar kolonies dennebome op Witteberg en Kromrivier dome te gaan help uitroei voodat hulle verder versprei.

Laat weet asb vir Gerrit Kritzinger as jul kans sien om te help – ons sal dit so kuier-kuier doen.

*Gerrit Kritzinger*

## Wolfbergskeure/Sanddrift – 1-2 Mei

Vrydag 30 April, 5 nm – daar gaat ons: die Krit-kombi – 8 stuks – 50% van die teenwoordigheidslys. Die ander helfte benodig glo twee voertuie om al die geriefies daar te kry – yskaste, ketel, leunstoele en, en, en - ook Charlie se verplantbare straatlamp – moet sê al die lekker luukses werk. Die grondpad anderkant Sederbergpas dril en skud die inhoud van die kombi stewig in posisie. Hannelize skryf toets, so sy swot, boek op die skoot, stuur tussen koagilate, sols en gels en suspensies deur, neem nog deel aan die agterbankers se lande en hoofstede kompetisie en luister na hul liedjies. Lekker jong – hanteer alles gelyktydig en kry ook nog onderskeiding – multi-tasking op sy jeugdige beste.

Met ons aankoms brand die vure reeds – dié vir lig en hitte en dié wat net warm maak. Gou bekom elkeen 'n gelyk stukkie aarde vir tent opslaan. Toe die Kritte se nuwe tenthuis se voorstoep staan, is ons almal daar. Die volgende more: die langloot bome in die kampterrein staan


dramaties in die vroegmore sonskyn met 'n dik goudgeel blaremat om hulle voete. Eers permitte kry. Die gewilde Wilde groenkaart werk – stap gratis (jy doen mos self die werk) net R25pppn vir kampering. Nou is ons effe agter die tye. Die eerste hele 1.4Km per motor tot by die koel akkerbome, dan die driftige tog die berg uit.



*Arriveer onder skeure: Frans Viljoen , Gerrit & Anneli van Zyl, Freda en Charlie Buckle, Johan & Erica Benkenstein, voor = Soekie de Lange*

Hygend bereik ons die voet van Wolfbergskeure (of is dit die bek?) Daar klim ons teen 'n rotslys uit. Anneli verplig haarself daaruit. Sy kom bo met haarself deurspoel van angs adrenalien – die swart pupille wyd gesper. Nou deur die rotsskeur met sy klipobstruksieblokke. Bo-oor of onderdeur – met trek en stoot en druk en rem vorder dit goed.

*Gerrit maak toe ook so*





Agterna slaan heelwat afskilferkolle op elmboë en knieë uit. Bo-uit sien ons die Wolfbergboog in die verte. Voetpad langs ten minste nog 'n uur se stap. In die boog se skadu eindelijk middagete. Die Berglysterpaar en rooivlerk streepkoppies sluit by die ete aan. Die Berglysters erken ontvangs van elke brokkie met 'n deftige opwip van die stert. 'n Toevallige, miskien misplaaste kantaantekening. Twee jong Engelse dames daag op. Na ete strek hul hulself uit op die rotsplaat in die son met blink geoliede lywe in kort-kort broekies en bra – ware koggel-man-ders. Na ete klouter 'n groep tot bo-op die rotsboog.



Die triomfantlike oomblik word van onder af deur die toeskouers omvattend op beeld vasgelê.



*Terrence in die bekende wolfbergboog*

Hierna brokkel die groep in segmente – Freda kry koffiekoors met net een saak in haar verwysingsraamwerk. 'n Ander

groepie gaan nog eers deur nog 'n rotskeur skuur om by die Wolfbergbaken te kom. Panoramiese uitsig van daar. Die berg bo gepak met rotstorings asof dit van onder af opwaarts uitgebars het. Vir die meeste is dit ook 'n eerste besoek. Dan huiswaarts deur die maklike oop rotsskeur – die Coca-Cola roete – en vir sommiges ook 'n eerste kennismaking. Vanaand om die vure – daar is glad twee rustig en bedeesd. Dit was tog nie so 'n uitputtende dag nie!? Begin die jare stadig tel. More word die 2de been van die Sanddrifstop aangepak: die Maltese Kruis. Die agterhoede raak 'n slag verlore en koers na Kromrivier op 'n afritroete, maar sluit weer gedweë by die hoofstroom aan. By die kruis doen pelgrims die sirkelroete om die kruis – tot twee keer. Hier word natuurlik ook weer geëet en gedrink. Nou is al wat oorbly afslaan, wegpak, afpak, inpak en die terugtog oor die dwars riewe van grondpad huistoe. 'n Besonderse naweek. Na 'n welbekende en veel besoekte Sanddrif en tog is daar nog altyd eerste ervarings vir vele. Bo-op die boog, Wolfbergbaken en selfs die oop skeur en Maltese kruis.

Soekie, die nuweling, vat die groep en naweek lekker saam: hulle is intelligent, eerlik (ek glo dit beteken minder korrekte "politeness" soos ons Engelse Vriende) en lighartig – dis vrolik, vol spitsvondighede en ons lag sò lekker.

*Frans Viljoen*

## BERGsosiaal

*Ek hoop almal wat die Bergklub se Nasionale Dinee in Bloemfontein op 15 Mei wil bywoon het betyds bespreek. 'n Uitnodiging was op 1 April aan lede gestuur.*

## BERGplante



Gerrit se mooi foto van die *Protea Witzenbergiana*. Frans sê dit is 'n hangkop blom van 'n kruipende Protea –moes opgelig word vir die foto.

Red.

## BERGlede

Dit is met groot spyt dat ons Christo en Liza Schlebusch se bedanking as lede ontvang het. Liza was 'n paar jaar Sekretaresse van hierdie afdeling en sy en haar gesin baie getroue stappers. *"Wie gaan dan nou vir ons in Sewefontein se grot sing, Liza?"* Ons hoop dat julle nie sal ophou stap nie en dat ons julle tog weer op een van die paaie sal teëkom.

Ons het ook Ferdie Botha se bedanking ontvang. Hy is reeds 15jr lid van BKSA en was ook vir twee jaar redakteur van hierdie Nuusbrief.

*"Ferdie, sterkte met al jou planne – hoop regtig ons kan jou weer iewers in die toekoms as lid verwelkom soos jy belowe."*



Ook Frik & Brigitte Visagie het bedank – hulle verlaat die land en sal voortaan op vreemde (vir ons) paaie stap. Mooi loop – ons gaan julle mis.

## BERGdagboek

15-16 Mei : Naweeke – Rooiberg  
(Sederberge): Charl Lombard  
082 411 4323

1-11 Jun: Langstap – Wildekus: Johan  
Botha 083 235 5355

26-27 Jun: Naweeke – Agtertafelberg hut:  
Hannes 082 441 5413

17 Jul : Dagstap – Pipetrack (Tafelberg,  
Kaapstad: Ludi 082 874 1770

23 Jul: Klubaand by die Kritzingers  
Gerrit 083 303 0428

*Neem kennis dat 7-8 Aug stap gekanselleer is*

## BERGbriewe

Martin en Gerda Botha het laat weet dat hul naweek huisie(s) in Bainskloof beskikbaar is vir BKSA (Tygerberg) lede! Kontak gerus vir Martin by 021-7122026 of 0721589398 of [martinj.botha@absamail.co.za](mailto:martinj.botha@absamail.co.za) indien julle oornag of naweekverblyf soek in Eerste Tol (Bainskloof).

---

### 90<sup>th</sup> July Camp, Crystal Waters, 3 to 17 July 2010

You may recall that I wrote to you, in high spirits late last year, outlining my hopes and plans for celebrating the 90<sup>th</sup> July Camp with a special camp in the southern KZN Drakensberg.

**The GOOD news is that although this notice is so very late, there WILL be a July Camp, from 3 to 17 July, at a beautiful campsite on the farm, Crystal Waters, near Bushman's Nek in the southern Berg**

**on the farm of Mr and Mrs Arthur Cole.**

In essence July Camp will be what July Camp always was, and will be fully described in the usual notice and application form that will be sent out before the end of the week, BUT we wanted you to have the exact dates, the place (off to the right of the road to Bushman's Nek) and the remarkably good news that the costs, unbelievably, will be the same as last year's!!!!

Best wishes and hoping to see you at the 90<sup>th</sup> July Camp

*July Camp Convener* Rikki Abbott  
[rikki.abbott@kzndae.gov](mailto:rikki.abbott@kzndae.gov) 082 538 5389

## BERGpitkos

*Start your photograph album from today.  
If you try to do the backlog first, you'll  
never arrive at today*

From the tiny book of TIME

by Kim Pickin and Nicky Singer

## BERGbydraes



Enige nuus, menings en interessante inligting is baie welkom.

Stuur bydraes in die taal van u keuse.

Any news, views and interesting information welcome.

Submissions can be in the language of your choice.

Please send contributions to Mariana Rabie at [mariana@agriexpo.co.za](mailto:mariana@agriexpo.co.za).

The items in this Newsletter are reported in the interest of the Tygerberg Section of the Mountain Club of South Africa. We strive for factual accuracy, but cannot be held liable for any inaccuracies in the information reported. The views expressed by the authors do not necessarily reflect those of the MCSA.

---o0o---

Articles, except reprints from other sources, may be reprinted or cited without permission, provided that the source, **Bergnuus, Tygerberg**, is acknowledged. / Die menings van die skrywers weerspieël nie noodwendig dié van die **BKSA** nie. Artikels, behalwe herdrukke uit ander bronne, mag sonder verlof herdruk of aangehaal word, mits die bron, **Bergnuus, Tygerberg**, erken word.

**Word 'n Bergklublid en stap saam!**